

ALA VESTA DAL "BRAGHER"
ANCH AL "SGNOR"
AL S'E' MESS A ZIGHER!

"AL BRAGHER"

ANN XI - Nòmer 3

FÀII DLA DISTILLERÌ CLANDÈSTEINA VGNULÉSA

Dizàmbèr 2005

L'È D' VGNÒLA AL PRÉM "SÉNDÈCH STRADÈIN!"

Préma i fann un monumeint... pò i-s mätten a pée par l'inquinamèint



Ragazz che bròtta nòtt! A-m sòun insugnè che i tognari iéren turnè a Vgnòla e par mustrer la sòo efficèinza in un bàter d'oc i aviven bèli tiré sò un bunker in dal zèinter dla piazza dla "Mèzaluna" e sistémè un batagliòun dla "Sturmtruppen" par tgnir sàtta cuntròll la situaziòun.

Dèinter d' mè a-m sòun détt: "la storia la s' ripét: vòt vadder ch'i-m vòlen fèr fòra anch cl'èter braz?" Quand a l'ho cuntè al bar i sèin méss tòtt a sghignazèr e a canter: "Una mattina mi sono alzato, oh bella ciao, bella ciao, bella ciao ciao ciao... e ho trovato l'invasor".

Ma quand a sòun rivé a Vgnòla, in dal mèz ed Còrs Italia al bunker al gh'era davéra; par un ann i hann druvè al "metòd calabrés": préma i cuacen l'area còun di panée e dal rédi féssi par a-n fèr vadder ala zèint quàl che i hann stròlghè.

E' véra che tòtt i saviven che iéren adré a fèr di schèv in "Corso Italia" par fèr di parcàgg sàtt-tèra e che tòtt iéren d'acòrd, trane al diretòr dal fòl "Al Bragher", finchè, a l'improvvis, da sòvra ai sbaramèint la zèint la vdè spuntèr dal turati cal pariven di bunker ed vècia memoria; i vgnulés, incuriosi, i s'eren méss a comentèr a vòs basa, par pòra ch'agh fòssa in gir al spii dal comun; ogniùn al giva la sòo ma la spiegaziòun piò curiosa, o par méi dir fantasiòsa, al l'ha dèda un tip, sèinz'èter ed dèstra, ch'l'ha détt: "al Sèndèch al s'è muntè la testa e vést quàl ch'l'ha fatt Berlusconi in Sardàgna e Bush a Camp David, la pinsè d'a-n èser da meno e l'ha fatt sistemèr un apartamèint sàtt-tèra, un bunker a pròva ed bàmba atomica, par psèr èser in grèd ed sbruièr i problema di vgnulés in chès d'evèint catastrofich: a-n s' sa mai, còun i tèimp ca còrr a créer dal casèin a prévv 'rivèr al tornado "Maria Blu" e l'è méi tòr i rimédi in tèimp." Come a giva mé nòn: "Pèinsa par tè e par chi èter s'agh n'è!". Quand i bruntlamèint dal pòpulèin ièin 'rivé in élt, par màttri a tasèr i hann tiré fòra un comunicèt a mèzz d' "Vignola new" e i vgnulés i hann imparè 'sa buiva in dla pgnata, ma quand i hann descuèrt al cuèrc ièin armès a bàcca avérta: i cuntèint i-s cuntèven còun i dii dal man, quèsi tòtt amministradòr, la maggioranza l'è armèsa mòta e quii chi vliven dir la sòo ièin stè tgnùu ala lèrga. Adèsa, par completèr l'opera, agh cala sòl un quèl, un bèll monumèint; l'idèa dal fòl "Al Bragher", a l'origin, l'era tòtta divèrsa ma vést com'è andè i quèe a vénn da sugerir ed piazzèr òna bèla machina, magari òna "Ferrari", sòvra al bunker, un monumèint in tema còun al parcàgg e còun "Modena...terra di motori"! Che al fòl "Al Bragher" al sia da sèimper stè cuntrari a 'sta trasformaziòun a-n n'è ménga 'na novitè, tantchè l'iva méss zò un "pàtt còun i vgnulés" préma dagli ultmi eleziòun amministrativi ma, a-n n'esànd ménga ai livée d' Berlusconi, nisùn g'ha pòs a mèint: préma o pò al magagn al vénen ala lus, sòl adèsa la zèint la s'n'è adèda d'avèr pèrs l'onica piàza ca gh'era a Vgnòla, ma come a giva mé nonn: **quàl ch'è fatt è fatt e a-n s' tòrna piò indré.**

'Sa dir dal Sèndèch: préma ed lò nisùn è stè bòn d'arbaltèr al strèdi ed Vgnòla come l'ha fatt lò, e d'un quèl a sòun sicur:

Roberto Adani al pasarà ala storia d' Vgnòla come "Al Sèndèch stradèin!"

Ma in tòtta 'sta manovra agh'è quèl ch'a-m scapa; préma i hann fatt "al pésti ciclabilì" par avier la zèint a druvèr la biciclata, ma s' l'era l'onica soluziòun par risolvèr al problema dal trafich, egh bisàgn gh'era ed fèr un parcàgg ed 'sta purtèda?

Dàp a tòtta 'sta rivoluziòun, quàsta l'è nòva e fràsca, al Vice-Sèndèch, Pavlèin Mòrsèli, l'ha fatt n'ordinanza dove, fin ala fin d' mèrz, par dimàndi vturi agh srà al divièt ed girèr dèinter Vgnòla, a cal punt chè a-m suvven un dòbbi: o chi aven avù un finanziaimèint a fànd pèrs dal cà automobilistich par custranzèr la zèint a tòr al machin còun al tub di scarègh catalittich o ièin d'acòrd còun Berlusconi quand al dis ed lavurèr di piò, parchè, par stèr còun i urari ed circolaziòun fissé, un ch'al vaga a lavurèr a sètt òr dla matèina a-n pòl nè andèr a magnèr a mèzdè n'è turnèr a cà préma dal sètt e mèzz ed sira: par lavurèr sèe òr bisàgna stèr impgné dades òr o cambièr machina. Còun l'obligh dla marmèta catalittica a pariva che tòtt i problema d'l'inquinamèint dl'aria i fòssen finì invece ...i s'hann méss a pé!

Al "Dio-machina", nonostante tòtt i countrasèins dla società mudèrna, l'avù ancàra 'na vòlta la méi: a màttreggh òna pèza, anch sa g'ho di dòbbi, a srà al prezi dla binzèina e la ciavèda che i g'hann rifilé, vést chè i pòst sàtta-tèra òna pèrt l'è par chi ha cumprè al pòst-machina, n'ètra pèrt par quii chi vòlen fer l'abunamèint e quii dla piazza, che préma iéren a gratis, adèsa ièin dvintè a pagamèint...e a-n cardidi che la fòla la sia finida chè: considerand i tàl prevést dala finanziaria, i Comun, si vòlen batèr cassa, i ariverann a fèr paghèr i parcàgg anch in dal vèc marchè!